

ጳጳርሳ ፃፊዳ ኮይር ኪታ ጊዳ ቆፋ

ሃዋሬ ጳጳርሳ ፃፊዳ ኮይር ኪታዛ ጊዳን “ፆሳስ ደሬቲዳ ዳሬ” ጌቲቲ ፃይጌቲዛይታሰኔ ፑዳሃ ባጋራ ቁሪ ኢሲያ ዳሬን ላሌቲ ዲዛ አማኒዛይታሳ፡ ሄ ኪታሰ ዋና ቆፋይ አማኖ ጌዳን ዳር ሜቶይኔ ጎዳቲል ኢሰታ ቦላ ጋኪዳይታ ሚንጮፋናሲኔ ዳንጮፋናሲኮ። ፃፊዚ ሄሳሉ ኦሊዳይ ዩሱሳ ሃይቆ ጊሽ፣ ሃይቆፔ ዳንሳ ጊሺኔ ኢዚ ናምዓንሉ ሃ ሲሚ ያና ዩሳ ሂዳታ ቆንጨሲዛ ዩሱስ ኪርሰቶሳ ሚሺራቸ ቃላ ናባቢዛይታ ቆፊሳናሳ። ዩሱስ ኪርሰቶሲ ካሴ ዳዩዳ ዲሳ ለሚሶ ማላ ፃሊዲ ኢሰታካ ሜቶ ጌንጨ አፋናሰ ቤሲዛይሳ ቆፊሴስ። ሄይታራ ዉርሲ ጋሊዲ ሜቶይ ኢሰታ አማኖ ሚኖቲል ፓጨዛይሳኔ “ዩሱስ ኪርሰቶሲ ቆንጨዛ ጋላስ” ኢሰቲ ባስ ቤሲዛ ዋጋ ኤካናይሳ ኢሰታ ቆፊሴስ።

ፃፊዚ ኢሰቲ ሜቶ ዳንዲያና ማላ ኢሰታ ሚንጮፊካ ቦላራ ሄሳ ናባቢዛይቲ ኪርሰቶሳ ካሊዛይቲ ዳዓናሰ ቤሲዛ ዲሰ ዳና ማላ ቆፊሴስ።

- ሃ ማፃፋይ ኦይኪዳ ኩሜላ ቆፋ
- ጌሎሶ 1:1-2
- ፆሲ አሺዛዳ ጊዲዳይሳ ኤሪሶ 1:3-12
- ፆሳስ ዲማቲ ዳና ማላ ኢሜቲዳ ዘሬ 1:13-2:10
- ሜቶ ዋዳ አማኒዛይታ አላፊቲል 2:11-4:19
- አማኒዛይታ አሺኬቲልኔ ኢሰታ ኦሶ 5:1-11
- ኩሻ ቆፋ 5:12-14

1 ዩሱስ ኪርሰቶሳ ሃዋሬ ጊዲዳ ጳጳርሳ፣ አሳ ቢታን ቤቲን ዲዛይታሰ ጳንፆሳን፣ ጋላቲያን፣ ቃጳደቂያን፣ ኢሲያኒኔ ቢቲኒያ ቢታን ላሌቲ ዲዛ አንቲስ። 2 አዋይ ፆሲ ካሴ አንቲና ኤሪዳ ማላ ደሬቲዳይታሰ፣ ዩሱስ ኪርሰቶሳስ አዛዜታናሲኔ አንቲ ኢዛ ሱሳን አራጨቲዲ ጌያና ማላ ዓሎ አያናን ዲማቲዳ አንቲስ ኪያቲልኔ ሳርቲል ዳር።

ጌታ ሂዳታ
3 ዩሱስ ኪርሰቶሲ ሃይቆፔ ዳንዲዳ ጊሽ ኑስ ዳዎ ጊዲዳ ሂዳታ አሚዳይሲ ባ ጌታ ማርቲላን ኑና ባስ ኦራላ ናይታ ሂሰቲዳ

ኑ ጎዳ ዩሱስ ከርሰቶሳ አዋይ ያሲ ጋላቴቶ። 4 ኢዚ ጳዮንታ፡
ዋሬቶንታኔ ጩጎንታ ላታሶ ኢንቴሰ ሳሎን ጊሊሲ ዋሊዳሰ።
5 ኢንቴካ ወርሴላ ጋላሳን ቡሮ ቆንጫና አቶቴላሰ አማኖ ጌደን
ያሳ ዋልቃን ናጌቲዳታ።

6 ሃዒ ጉላ ዋዴሰ ዲማ ዲማ ፓጩቲ ኢንቴና ዋይሲኮካ
ኢንቴ ሄሳን ኡፋዬቲቴ። 7 ሄሲ ሄ ፓጩዚ ኢንቴ ቦላ ጋከዛይ
ኢንቴ አማኖዚ ቱሙ ጊዲዲይሳ ቆንጫሳናሳ። ጳያና ዋርቃይካ
ታማን ፓጩቴሰ። ዋርቃፌ አጲ ቦንቾ ጊዲዳ ኢንቴ አማኖይካ
ሄሳሉ ፓጩታናሰ ቤሴሰ። ሄሲ ሄ ፓጩቲዳ ኢንቴ አማኖይ ዩሱስ
ከርሰቶሲ ቆንጫዛ ጋላሰ ጋላታሰ። ቦንቾሲኔ ሳባሰ ኢንቴና ጋላና።
8 ኢንቴ ዩሱስ ከርሰቶሳ አይፌራ ቤዮንታ ኣጊኮካ ኢንቴ ኢዛ
ደሴታ፤ ሃዒካ ኢንቴ ኢዛ ቤዮንታ ኣጊኮካ ኢዛ አማኔታ፤ ጮ
ቃላን ቆንጫሳና ዲንዳዮንታ ጌታ ቦንቾ ኡፋይሰ ኢንቴ ኡፋዬቲታ።
9 ኢንቴ ናጊዛ ኢንቴ ሹምፖይሰ አቶቴላ ኢንቴ አማኖን ዳሚዳታ።

10 ሄ አቶቴላዛ ጊሽ ኢንቴሰ ኢሜታና ኪያቴላሰ ካሴ ናቤቲ
ሎዒላ ዋዘናፔ ፒልጊ ያሊዳ። 11 ካሴ ኢሰታን ዲዛ ከርሰቶሳ
አያናይ ያሳፌ ቲዩቲዲይሳ ቦላ ጋካና ዋዩዛኔ ሄ ዋዩዛፔ ጉዩ ኢዚ
ዳማና ቦንቾዛ ጊሽ ካሴ ባሰ ዋሊዳሰ። ኢሰቲ ቃሰ ሄሲ ወሪካ
አይዳ ዋኒ ሃናናኮኔ ዩሺ ቆፒዳ። 12 ሄ ካሴ ናቤቲ ኢንቴሰ ኦሊዳ
ኣቲን ኢሰቲ ባሰ ኦላንታይሲ ኢሰታሰ ቆንጩን ኤሬቲዳሰ። ኢሰቲ
ኢንቴሰ ኦሊዳይ ቦላ ሳሎፔ ከቲቲዳ ያሎ አያና ባጋራ ሃዒ ኢንቴሰ
ሚሺራቾ ቃላ ዮቲዳ አሳቲ ኢንቴሰ ዮቲዳይሳ ቆንጫሳናሳ። ሄሳ
ኔ ቃላ ከታንቻቲካ ቤያናሰ አሞቲዳ።

ያሳሰ ዲማቲ ዲሰ

13 ሄሳ ጊሽ ኢንቴ ኢንቴ ዋዘና ሱሪሲዲ ኦሶሰ ጊጌቲቴ። ዋጋራ
ዳዒቴ። ዩሱስ ከርሰቶሲ ቆንጫዛ ዋዴ ኢንቴ ኢዛ ኪያቴላ
ዳማናሰ ኢንቴሰ ኩሜላ ሂደታይ ዳዖ። 14 ኢንቴ ኣዛዜቲዛ ናይታ
ጊዲዲ ኤርንታ ዲሼ ኢንቴ ካሴ ኢዛን ዲዛ ኢታ ቆፋ ካሎፍቴ።
15 ኢንቴና ያይጊዳ ያሳይ ዲማ ጊዲዳ ማላ ኢንቴካ ኢንቴ ዲሳን
ኡባን ዲማቲቴ። 16 ጋሶይካ “ታኒ ጌሽ ጊዲዳ ጊሽ ኢንቴካ ጌሽ
ጊዲቴ” ጌቲቲ ጌሻ ማፃፋን ካሴ ያፌቲዳሰ። *

17 ኦናካ ዲማ ሻኪ ማደንታ ኢሳ ኢሳሰ ኢዛዳ ኦሶ ማላ
ፒርዲዛ ያሳ “ኢዚ ኑ አዋ” ጊዲ ኢንቴ ያይጊኮ ሃይሳ አላሜዛን
ኢንቴ ኢማሌኔ ቤቴ ኣሰ ጊዲዲ ዲዛ ዋዴ ኡባን ኢዛሰ ባቢቴ።
18 ኢንቴ ካሴ ኢንቴ አዋታፔ ላቲዳ ጮ ማላ ሃዳ ዲሳፌ

* 1:16 ለዌ 11:44-45፤ 19:2

ዎዘቲዳይ ጳጳዛ ቢራን ዎይኮ ዎርቃን ጊደንታይሳ ኢንቴ ኤሬታ።
 19 ጊደ ኣቲን ኢንቴ ዎዘቲዳይ ኢታይኔ ዎሶይ ኢዛ ቦላ ባይንዳ
 ጌሻ ደርሳ ማላ ጊዲዳ ኪርሰቶሳ ቦንቾ ሱፋና። 20 ኢዚ
 ኤሬቲዳይ ሃይሲ ኣላሜዚ ሜዴታናፕ ካሴ ጊዲሺን ሃሲ ቃሰ
 ዉርሴላ ዎዴን ኢንቴሰ ቆንጨዴሰ። 21 ኢንቴሰ ኣማኖይኔ ኢንቴ
 ሂደታይ ያሳን ጊዳና ማላ ዩሱሰ ኪርሰቶሳ ባጋራ ሄ ኢዛ ሃይቆፕ
 ዴንሲዲ ኢዛሰ ቦንቾ ኢሚዳ ያሳን ኢንቴ ኣማኔቴታ።

22 ኢንቴ ኣማኒዛይታ ሱሬ ዎዝናፕ ሲቃና ማላ ቱማሰ
 ኣዛዘቴላን ኢንቴ ኢንቴ ኣሳቴላ ጌሺዴታ። ሄሳ ጊሽ ኢንቴ ኢንቴ
 ጊደን ኢሶይ ኢሳራ ሎዔሲ ሲቁቲቴ። * 23 ኢንቴ ናምዓንሉ
 ዩሌቲዳይ ሜርናሰ ሚኒ ዲዛ ጳዮንታ ዴዎ ያሳ ቃላን ጳዮንታ
 ዜሬላፌ ኣቲን ጳጳዛ ዜሬላፌ ጊዳና። 24 ጌሻ ማፃፋይ ጊዛ ማላ
 “ኣሾ ማይዒዳይ ዉሪካ ማታ ማላ፤

ኢዛ ቦንቾይካ ዉሪካ ዎራ ጨሻ ማላ፤

ማታይካ ሜሌሰ፤ ጨሻይካ ቆኬሰ።

25 ጎዳ ቃላይ ጊዲኮ ሜርናሰ ኤቂ ዴሰ።”

ኢንቴሰ ሳባኬቲዳ ሚሺራቾ ቃላይካ ሄሳ።

2

ዴዎ ሹቲኔ ጌሻ ዴሬ

1 ሄሳ ጊሽ ኢታቴላ ዉርሲ፣ ባሌላ ዉርሲ፣ ቆዴፕ ቆሞን ሃና፣
 ቃናቴቴላ ኣይኮ ቆሞ ዘጊርሰ ኢንቴፌ ዲጊቴ። 2 ሃሲ ዩሌቲዳ ጉላ
 ናይቲ ማላ ኣሞቲዛይሳ ማላ ኢንቴካ ኣታናሰ፣ ኢዛን ዲጨ ዲጨ
 ባናሰ ጌሺ ጊዲዳ ኣያና ቲሚርቴ ላሞቲቴ። 3 ኢንቴ ላሞታናሰ
 ቤሲዛይ ጎዳይ ኪያ ጊዲዳይሳ ሻኪ ኤርኮኮ! *

4 ሄሳ ጊሽ ጌዴ ዴዎ ሹቶ ጊዲዳ ዩሱሳኮ ሸቂቴ። ሄ ሹታይ
 ኣሳይ ሌቂ ኣጊዳይሳ ሺን ያሳ ኣቻን ቃሰ ደሬቲዳይሳኔ ቦንቾ
 ዎጋይ ዲዛይሳ። 5 ኢንቴ ጌዴ ጎዳ ዩሱሳኮ ሸቃናይካ ዴዎ
 ሹታ ማላ ዓሎ ኣያና ዲሳሶ ጊዳና ማላ ኦሴቴታ፤ ሄሳሳካ ኢንቴ
 ዩሱሰ ኪርሰቶሳ ባጋራ ኡፋይሲዛ ኣያና ያርሾ ያሳሰ ሸሻናሰ
 ጌሻ ቁሴታ ጊዳንዴታ። 6 ጌሻ ማፃፋን “ሄኮ ደሬቲዳ ቦንቾ
 ጊዲዳ ኬላሰ ማዜኔን ኡቲዛ ሹቶ ታኒ ዒዮኔን ዎላና። ኢዛን
 ኣማኒዛይይ ዩላቴና” ጊዛ ቃላይ ያፌቲ ኡቲዴሰ። * 7 ሄሳ

* 1:22 ሱሬ ዎዝናፕ ኢሲ ኢሲ ጌሻ ማፃፋቲ ኩሜላ ዎዝናፕ ጌቴሰ። * 2:3
 ማዛ 34:8 * 2:6 ኢሳ 28:16

ጊሽ ኢንቴስ አማኒዛይታስ ሄ ሹቻይ ቦንቾ ሹቹኮ ሺን ሂንኮ ኢዛን አማኖንታይታስ ቃስ “ሹቻን ከጊዛ ከላ ሂላቲ ሌቂ ዎራ ዩጊዳይስ ኢዚ ከላ ማዜኔስ ሁዔ ጊዲዳስ”* 8 ቃሴካ “ሂኮ ኣሴ ቆጶዚ ሹቻይ ሃይሲቶ! ኣሳ ቆጶ ኩንዲሲዛ ዛላ ሹቻይ ሃይሳኮ” ጌስ። ኢሰቲ ቃላ አማኖንታ ኢዲዳ ጊሽ ቆጶቴቴስ። ካሴካ ኢሰቲ ሄሳስ ዲዛይታ። *

9 ኢንቴ ቃስ ቆማፔ ጌዴ ዳር ማላሊሲዛ ኢዛ ፖጎኮ ዪይጊዳ ማላሊሲዛ ያሳ ኦሶ አዎጃናስ ደሬቲዳ ዩሌቴሉ። ካዎ ቄሴታ፡ ያሲ ኢንቴና ባስ ሂሰቲዳ ኢንቴ ዲማ ዴሬታ። * 10 ኢንቴ ካሴ ያሳ ዴሬ ጊዳኬታ ሺን ሃዒ ጊዲኮ ኢንቴ ያሳ ዴሬ። ኢንቴ ካሴ ኢንቴስ ያሴ ቃጴቶንታ ዴሬኮ ሺን ሃዒ ጊዲኮ ቃጴቲዳስ።*

ያሳ ኦሳንቻታ

11 ታ ሲቆቶ! ኢንቴ ሃይሳ ኣላሚዛ ቦላ ኢማጮኔ ቤቴ ኣስ ጊዲዳ ጊሽ ሹምፖራ ኦሌቲዛ ኣሾ ኣሞቴላታፔ ሃካና ማላ ታ ኢንቴና ሃዳራ ጋይስ። 12 ኦኔ ኤሪዛይ “ኢንቴና ኢሰቲ ኢታ ኦሌቴስ” ጊዲ ኣሳይ ዘጊሪኮካ ያሲ ኦና ቤያናስ ዪዛ ጋላስ ኣይዛቤቲ ኢንቴ ኦሶይ ሎጎ ጊዲዳይሳ ቤዒዲ ያሴ ጋላታና ማላ ኢንቴ ኢስታራ ዲዛ ዎዴ ኢንቴ ኣማሌይ ሎጎ ጊድ።

13 ኢንቴ ጎዳ ዩሱሳ ጊሽ ጊዲ ዴሬ ኣይሲዛይታስ ኣዛዘቲቴ። ካዎይ ቃስ ኡባሬ ቦላራ ዲዛ ጊሽ ካዎሲካ ኣዛዘቲቴ። 14 ዴሬ ኣይሲዛይታስ ኣዛዘቲቴ። ኢሰቲ ኢታ ኦሌዛይታ ቃጎያናሲኔ ሎጎ ኦሌዛይታ ጋላታናስ ካዎፔ ከቴቲዛይታ። 15 ኢንቴ ሎጎ ኦሶን ሃንኮ ኤራይ ባይንዳ ኤያቴላን ሃሳዪዛይታ ጮፀ ሂሰታና ማላ ሄሲካ ያሳ ሹኔ። 16 ኢንቴ ያሳስ ኦሌዛ ኣሳታ ማላ ጊዲዲ ሂርጋይ ባይንዳ ዴዒቴ ኣቲን ኢንቴ ኢንቴ ሹኔ ማላ ዲዛ ዲሳ ኢታቴላ ካሚዛ ሚሽ ሂሰቶፍቴ። 17 ኣስ ኡባካ ቦንቹቴ። አማኒዛይታ ሲቂቴ። ያሳስ ባቢቴ። ካዎ ቦንቹቴ።

ከርሰቶሳ ዋይቴላ ሌሚሶ

18 ኢንቴኖ ኣሳስ ኦሌ ኣቂዛይቶ! ኢንቴና ኦሲሲዛ ጎዳታስ ቦንቾን ኣዛዘቲቴ። ኢንቴ ኣዛዘታናይ ሎጎታሲኔ ኣሽኬታስ ያላላ ጊድንታ ሃንኮ ኢታታሳራኮ! 19 ኣሲ ጋላቴቲዛይ ጮ ሚላ ቆሄቴሹ፤ ሄሲካ ያሳ ጊሽ ጊዲ ዳንዲያና። 20 ኢንቴ ኢታ ኦሌዳ

* 2:7 ማዛ 118:22 * 2:8 ኣሳ 8:14-15 * 2:9 ከሳ 19:5-6፤ ኣሳ 43:20-21፤ ዛሬ 4:20፤ 7:6፤ 14:2፤ ቲቶ 2:14፤ ኣሳ 9:2 * 2:10 ሆሴ 2:23

ጊሽ ቃፃዬተሼ ዳንዳዪኮ ኢንቴሰ ኣዛ ጋላታይ ዳኔ? ኢንቴ ሎዖ ኦሊዲ ዋዩ ኤኪሼ ዳንዳዪኮ ኢንቴ ያሳፌ ጋላታ ኤካንዴታ።
 21 ኢንቴ ዌይጌቴዳይካ ሃሳሳ። ኢንቴ ኢዛ ለሚሶ ካላና ማላ ከርሰቶሲ ኢንቴ ጊሽ ዋዩ ኤኪዲ ኢንቴሰ ለሚሶ ገዲዴሰ።
 22 ኢዚ ኣይኮ ናጋራካ ኦሊቤና። ኢዛ ዱናን ጌኔይ ቤቴቤና። *
 23 ኣሳይ ኢዛ ጫዩሺን ኢዚ ዛሪ ጫዩቤና። ዋዩተሼ ባና ቱሙ፡ ፒርዲዛ ጎዳሰ ሃዳራ ኣሉ ኢሚዴሰ ኣቲን ሃሎ ኬሳና ማንዲቤና።
 * 24 ኑኒ ናጋራፔ ሻካቲዲ ዒሎቴላን ዳና ማላ ኢዚ ባርካ ባ ኣሾን ኑ ናጋራ ማሰቃሌ ቦላ ቶኪዴሰ። ኢንቴ ኢዛ ማዲንላን ፓዒዴታ።
 * 25 ኢንቴ ጳዩዳ ድርሳታ ማላ ጮ ማላ ቱይሩ ቱይሪዴታ ሺን ሃዒ ቃሰ ኢንቴ ሹምፖ ሄሚዛይሳኮኔ ናገዛይሳኮ ሲሚዴታ።

3

ኣዚና ጊሺኔ ማቺ ጊሽ

1 ሃሳሳካ ማቺቶ! ኢንቴ ኢንቴ ኣዚናታሰ ኣዛዜቲቴ። ሃሳላ ኢሲ ኢሲ ኣዚናቲ ያሳ ቃላ ኣማኖንታይታ ገዲኮካ ጮ ማላ ባ ማቺታ ሎዔቴላን ፃላላ ሲሞንታ ኣጌቴና። * 2 ኢሰቲ ሲማና ዳንዳዩዛይ ኢንቴ ጌሻቴላኔ ኢንቴ ኣሴ ቦንቺዛ ዱሰ ዲዛይሳ ቤዩዲኮ። 3 ኢንቴ ሎዔቴላ ጮ ማላ ሁዔ ዳላኒኔ ዋርቃን ጌፀቴላን፣ ኣልዖ ማኖ ማይዖን፣ ጮ ማላ ኣይፌን ቤቴዛ ጌፀን ገደፖ። * 4 ኢንቴ ሎዖይ ያሳ ሲንላን ዋጋራ ዲዛ ኬሂ ቦንቺቲዳዚኔ ጳዮንታ ጌፀን፣ ኣሽኬቴላን፣ ኣዳቴላኒኔ ኣያናን ጌፀቲዳ ዋዝና ጋርሳን ቆቴቲ ዲዛ ገደ ዋዝና ሎዔቴላ ገደ። 5 ቤኒ ዋዴ ባ ሂደታ ያሳን ኦሊዳ ጌሻ ማጨሳቲ ጌፀቲዳይ ሃይሳ ማላና። ኢሰቲ ባ ኣዚናታሰ ኣዛዜቲዳ። 6 ኢሰቲ ኣዛዜቲዳይካ ሳራይ ኣብራሃሜ “ታ ጎደ!” ጋዳ ኣዛዜቲዳይሳ ማላ። ኢንቴካ ሎዖ ሚሽ ኦሊኮኔ ኢሲ ኢታ ሚሽ ኢንቴና ዳጋንሉንታ ኣገኮ ኢንቴ ሳራ ናይታ።
 7 ኣዚናቶ! ኢንቴ ኢንቴ ማቺታራ ኣከካን ኢሲፌ ዴዒቴ። ኢሰቲ ኢንቴፌ ዳቡራንቻ ሚዴቴላ ገዲዳ ጊሺኔ ቃሴካ ያሰ ጮ ማላ ከዖቴላን ኣሚዛ ዴዖ ኢሰቲ ኢንቴናራ ኢሲፌ ላታናይሳ ጊሽ ኢንቴ ኢሰታ ቦንቺቴ። ኢንቴ ሄይሳላ ኦሊኮ ኢንቴ ዋሳ ቆጶዲዛ ሚሽ ዴና። *

* 2:22 ኢሳ 53:9 * 2:23 ኢሳ 53:7 * 2:24 ኢሳ 53:5 * 3:1 ኤፌ 5:22፤ ቆላ 3:18 * 3:3 1ፂሞ 2:9 * 3:7 ኤፌ 5:25፤ ቆላ 3:19

ሎዎ ኦሌዛ ጊሽ ዋዬ ቤዎ

8 ሄሳፌ አሳ ባጋራ ቃስ እንቴ ኢሶይ አሳራ ሲቆን ዲቴ። ሃራ አሳ ቦላ ጋኪዛ ሜቶ እንቴ ሜቶ ማላ ያሊቴ። እንቴ እንቴ ጋርሳን አሻንታ ማላ ሲቁቴቴ። አሺኬታኔ ኪያታ ጊዲቴ። 9 አንጂቴ አቴን ኢስታስ ኢታ ጫሻስ ጫሽ ዛርፕቴ። እንቴ ያይጌቴዲይ ሄሳዶ ኦሌዲ አንጅ ላታናሳ። 10 ጌሻ ማፃፋይ ጊዛ ማላ “ዳዎን ዳና ኮዪዛይኔ ሎዎ ጋላሳታ ቤያናስ ኮዪዛ አሲ ባ ዲናፕ ኢታ ሃሳዮንታ ማላኔ ባ ሜቴርሻቴካ ጌኔ ሃሳዮንታ ማላ ናጌቶ። 11 ኢታ ዮዖፔ ሃኮ፣ ሎዎ ኦሎ፤ ሳርቴሳ ኮዮኔ ካሎ። 12 ጎዳ አይፊቴ ያሎታ ባጋ ያሌቴስ። ኢዛ ሃይፊቴካ ኢስታ ዋሳ ሲያናስ ደያ ዳቴስ። ሂንኮ ኢታ ኦሌዛይታ ቃስ ጎዳይ ባ ሃንቆ አይፊሶ ቤሳና” ጊዳስ።

13 እንቴ ሎዎ ኦላናስ ሚኔቴኮ እንቴ ቦላ ኢታ ሚሽ ጋላናይ ኦኔ? 14 እንቴ ሎዎ ኦሌዲ ጊሽ ዋዬ ቤዲኮካ እንቴ አንጅ ኤካና። አሳይ እንቴ ቦላ ኢታ ኦላናስ ማንዴቴዛይሳስ ባቦፊቴኔ ዳር ቆፖፍቴ። * 15 ጎዳ ኪርሰቶሳ እንቴ ዋዝናን ቦንቺቴኔ ኢዛ እንቴ ዳዎስ ጎዳ ሂስቴቴ። እንቴስ ዲዛ ሂደታ ጊሽ እንቴና ኦይቺዛይታስ ኡባስ ዛር አማናስ ኡባ ዋዴ ጊጌቴ ኡቴቴ። 16 እንቴ ኢስታስ አማና ዛርይ ቃስ አሽኬቴላኒኔ ቦንቺን ጊደ። እንቴ ኪርሰቶሳይታ ጊዲዳ ጊሽ እንቴስ ዲዛ ሎዎ አማሌዛ ጊሽ ኢታ ሃሳዪዛ አሳይ ባ ኢታ ሃሳያን ዬላታና ማላ እንቴስ ሎዎ ቆፋይ ዳዎ። 17 ያሳ ሽኔ ጊዲኮ እንቴ ኢታ ኦሶ ኦሌዲ ዋዬታናይሳፊ ሎዎ ኦሶ ኦሌዲ ዋዬቴኮ ሎዎ። 18 ኪርሰቶሲካ ኦና ያሳኮ ሽሻናስ ኢዚ ባ ሁዔስ ያሎኮ ሺን ሃንኮ ያሎ ጊደንታ ኦ ናጋራ ጊሽ ናምዓንጮቶንታ ማላ ኢሲቶ ዋዬቴዲ ሃይቁዳስ። ኢዚ አሾን ሃይቁዳስ ሺን አያናን ቃስ ፓዲዳስ። 19 ሄሳ ሄ አያናን ቃሾ ኬላን ዲዛ ሹምፖታኮ ቢዲ ኢስታስ ሚሺራቾ ቃላ ዮቴዳስ። 20 ሄይቴ ሄን ዋይኔ ኬላን ዲዛ ሹምፖቴ ካሴ ኖሄ ዋዴ ማርካቤዚ ኦሌቴ ጊሺሺን ኢስቴ ሲማና ማላ ያሲ ዳንዳያን ናጊሺን ኦኒ ኔስ አዛዜቶኮ ጊዳይታ። ሄ ማርካቤዛን ጌሊን ሃሌፊ አቴዳይታ ቆዳይ ኦሶፑን ጊዲዳ ጉላ አሳታ ያላላ። * 21 ሄሲ ሄ ሃላይ ሃዒ ቃስ እንቴ ኢዛን አቴዛ ዲንቃቴ ለሚሶ። ሃይሲ ዲንቃቴይ ቂታ ቦላ ጌያናስ ሜጬቴሌ ጊደንታ ጌሻ ቆፋ ኤካናስ ያሳኮ ሺሺዛ ዋሳ። ኢዚ እንቴና አሻናይካ ዬሱስ ኪርሰቶሳ ዳንላ ባጋራ። 22 ኢዚ ፑዴ ሳሎ ቢዲ ሃዒ ያሳ አቻን ዳስ። ኪታንቻቴኔ ጎዳቴሌ ኢስታስ

* 3:14 ማቶ 5:10፤ እሳ 8:12-13 * 3:20 ሜዴ 6:1-7:24

ዲዛይት ዋልቃማታካ ኢዛስ ሃራቲዳ።

4

ጌሻቴላን ዲስ

1 ከርስቶስ ባ አሾን ዋዬ ኤኪዳ ጊሽ አንቴካ ኦላ ኦሌቲዛ ሚሼ ጊዳዳ አሳ ማላ ሃይሳ ሃ ቆፋን ሚኒዲ ጊጌቲቲ። ባ አሾን ዋዬ ቤዱዳ አሲ ናጋራ ኦሶ አጊዴስ። 2 ሄሳፌ ጉዬ ባ ዲዛ ዋዬ ኡባን ኢዚ ዳናይ ኢታ አሾ አሞቴሌ ኦሶን ጊዶንታ ዲሼ ያሳ ሼኔ ፖሎና። 3 ሂንኮ ዴሪ አሳቲ ኦሊዛይሳ ማላ አንቴ ጮ ማላ ዬዳ ዲሳን አሾ አሞን፣ ማሉን፣ ኦጌይ ባይንዳ ካሳን፣ ዋጋፔ አሊ ኡዬዲ ዱሩሳኒኔ ሃራሲዛ ኤቃ ጎይኖን ካሴ አንቴ አሊዳ ዋዴዚ አንቴስ ጊዳና። 4 ሃዒ ቃስ አንቴ ሃ ዮዎዛን ኢስታራ ዋጋይ ባይንዳ ቁዳ ቁዳንታ ጊሽ ኢስቲ ማላሌቴቴሴኔ አንቴና ጫዬቴስ። 5 ጊዶ አቲን ሃይቁዳይታ ቦላኔ ፓፃ ዲዛይታ ቦላ ፐርዳናስ ጊጊ ኡቲዳይሳስ ኢስቲ ዛር ኢማና። 6 ሃይቁዳይታሳራ ሚሽራቾ ቃላይ ዮቴቲዳይ ሄሳ ጊሻሳ። ሄሳቃካ አይ አሳ ቦላካ ፐርዲዛ ማላ ኢስታ አሾ ቦላ ፐርዳና። ኢስታ ሹምፖይ ቃስ ያሲ ዲዛ ማላ ዴዮን ዴያና።

ያሳ አሞታታ ዋጋራ ጎዔቴላ

7 ሄሳ ጊሽ ዋዴ ወርሴሌ ማቲዴስ። አንቴ ሚኒ ዋሳናስ ዳንዳያና ማላ ዋጋራ ዲቲኔ ዋፑ ጊዳ ቆፋይ አንቴስ ዴዮ። 8 ሲቆይ ዳር ናጋራ ካሚዛ ጊሽ ሃራፔ ቦላራ አንቴ አንቴ ጋርሳን ሎዔሌ ሲቁቲቲ። * 9 ዙዙንላ ባይንዳ ኢሶይ ኢሳ አማላቴላ ሞኪ ኤኪቲ። 10 ዲማ ዲማ ጊዲዳ ያሳ ኪያቴላ አሞታታ አማኔቴላን ኦይኪዲ አንቴፌ ኢሲ ኢሲ አሲ ባስ አሜቲዳ ያሳ ኪያቴላ አሞታን ሃራ አስ ማዶ። 11 ታማርሲዛዴይ ያሳ ቃላ ታማርሲዛ ማላ ታማርሶ፤ ሃጋዚዛዴይ ያሲ ኢዛስ አሚዛ ዋልቃን ሃጋዘ፤ ሄሳ ማላን ያሲ ዬሱስ ከርስቶሳ ባጋራ ሃኒዛ ኡባን ጋላቴታና። ቦንቾይኔ ጎዳቴላ ሜርናፔ ሜርና ጋካናስ ኢዛስ ጊዶ። አሚን!

ሜቶ ዳንዳዮ

12 ታ ሲቆቶ! አንቴ ታማ ማላ ፓጪዛ ሜቶ ጊዶን ጌሊዛ ዋዴ ሄሳ ማላይ ካሴ ባይንዳ ኦራላ ሚሺ ጋኪዳዝ አንቴስ ሚሳቲን ማላሌቶፍቲ። 13 ሄሳፌ ቦላራ ከርስቶሳ ቦንቾይ ቆንጪዛ ዋዴ አንቴ ከሂ ኡፋዬታና ማላ አንቴ ኢዛራ ኢዛ ዋዬዛ ኤኪዛይታ

* 4:8 ለፆ 10:12

ጊዲዳ ማላ ኡፋዬተቲ። 14 ኢንቴ ኪርሰቶሳ ሱንጻ ጊሽ ጫዬቲኮ ቦንቾ ኣያናይ ሄሲካ ያሳ ኣያናይ ኢንቴ ቦላ ሸምፐዛ ጊሽ ኡፋዬተቲ። 15 ኢንቴፌ ኦና ቦላካ ማቶይ ጋኪኮ ሄሳዴይ ሸምፐፕ ዋጲዳ ኣሳ ማላ፡ ካይሶ ማላ፡ ኢታ ኦሊዳ ኣሳ ማላኔ ኣሳ ዮዖ ጊደ ጮ ዋዒ ጌሊዳዴ ማላ ጊደፖ። 16 ኢዚ ኣማኒዛዴ ጊዲዳ ጊሽ ኢዛ ቦላ ጋኪዛ ማቶይ ዲኮ ቃስ ኪርሰቶሳ ሱንጻን ኢዚ ያሳ ጋላቶ ኣቲን ዬላቶ።

17 ፐርዳይ ደሚታናሰ ዋይይ ማቲዴሰ። ሄ ፐርዳይ ደሚታናይ ኮይር ያሳ ኣሳ ቦላኮ! ሂሰቲን ፐርዳይ ኦናን ደሚኮ ያሳ ሚሺራቾ ቃላስ ኣዛዜቶንታ ኢዲዳ ኣሳ ወርሴሊ ኣይ ጊዳኔ? 18 ጌሻ ማፃፋይ “ዲሎይካ ዋይዲ ኣታናዝ ጊዲኮ፡ ሃንኮ ያሳስ ሳይናንታ ኣሳይኔ ናጋሪንቻቲ ዋናንዴቶ?” ጊዛ ማላ። * 19 ሄሳ ጊሽ ያሳ ሼኔ ማላ ዋይቲዛ ኣሳቲ ባናቴላ ወርሲ ኣማኔቲዳ ባና ማጲዳይሳስ ሃዳራ ኢሚዲ ሎዖ ኦሶ ኣላንታ ኣጎፌቶ።

5

ያሳ ኣሳ ኣይሳናሰ ኢሜቲዳ ዋጋ

1 ሄሳ ጊሽ ታካ ኢስታራ ኢሲፌ ዋሳ ኬላሰ ጨማኔ ኪርሰቶሳ ዋይዛሰ ማርካ ጊዲዳ ታኒ ቃሴካ ቡርፔ ቆንጫና ቦንቾዛ ጊሽታናሰ ዲዛ ታኒ ኢንቴናራ ዲዛ ዋሳ ኬላ ጨማታ ዘራይሰ። 2 ኢንቴሰ ሃዳራ ኢሜቲዳ ያሳ ወዴ ናጊቴ። ሄ ኢዛ ወዴዛ ዋልቃራ ጊደንታ ያሲ ኮዩዛ ኦጌራ ደሳራ ሄሚቴ። ሚሹሰ ዩቄቴላን ጊደንታ ሃጋዛናሰ ዋዝናፔ ኮሻን ጊደ። * 3 ሄሳላካ ኢንቴ ኣላፌቴላ ጋርሳን ዲዛይታ ዬጲ ሃርን ጊደንታ ወዴዛሰ ሎዖ ለሚሶ ቤሶን ጊደ። 4 ኢንቴ ሄሳላ ኦሊኮ ሃንኮ ዋና ሄሚዛይሲ ቆንጨዛ ዋዴ ኢንቴ ሞሬቶንታ ቦንቾ ኣክሊሌ ኤካና።

5 ሄሳላካ ኢንቴና ናቴላቶ! ኢንቴ ጨማታሰ ኣዛዜቲ። ኢንቴ ወሪካ ኣሽኬቴላ ኣፋላ ማላ ማይዲዲ ኢሶይ ኣሳሰ ኦሊቴ። “ያሲ ኦቶሪዛይታ ኢዴሰ። ኣሽኬታሰ ቃሴ ባ ኪያቴላ ኢሜሰ” ጌቲቲ ካሴ ጌሻ ማፃፋን ፃፌቲዴሰ። * 6 ሄሳ ጊሽ ያሲ ባ ዋዴን ጶቁ ሂሰታና ማላ ሚኖ ያሳ ኩሹፔ ጋርሳራ ኢንቴና ዘቂ ሂሰቲቴ። * 7 ኢዚ ኢንቴሰ ቆፒዛ ጊሽ ኢንቴና ማቲዛ ቆፋ ወርሲ ኢዛ ቦላ ዬጊቴ።

* 4:18 ለም 11:31 * 5:2 ዮሃ 21:15-17 * 5:5 ለም 3:34 * 5:6 ማቶ 23:12፤ ሉቃ 14:11፤ 18:14

8 ዎጋራ ዳዒቲ! ቤጊቲ! ኢንቴ ሞርኬ ዳቡሎሲ ባሰ ሚታና ሚሽ ኮዪሽ ፃጊዛ ጋሞ ማላ ኢንቴ ዩሾን ሃርቡቁሰ። 9 ኣላሚ ኩሚላን ዲዛ ኢንቴ ኢሻቲ ሄሳ ማላ ሜቶ ኤካና ዲዛይሳ ኢንቴ ኤሪዲ ኣማኖን ሚኒ ኤቁዲ ኢዛሪ ኤቁቲቲ። 10 ኢንቴ ጉላ ዎዴሰ ዋዩቲዳይሳፊ ጉዬ ኢንቴና ኪርሰቶሳ ባጋራ ጌዴ ሜርና ቦንቸሰ ፃይጊዳ ኪያቴሰ ኡባሰ ጎዳይ ኢዚ ባርካ ኢንቴና ጋኪዳ ዋዩዛፔ ኢሻና፣ ማዳናኔ ሚንጹላና ቃሴካ ዳዝጊሳና። 11 ቦንቸይኔ ዎልቃይ ሜርናፔ ሜርና ጋካናሰ ኢዛሰ ጊዶ። ኣሚን።

ወርሴላ ሳሮካ

12 ታኒ ኢዛን ኣማኔቲዳ ኢሻ ጋ ቆፒዛ ሲልዎኖሴ ባጋራ ሃይሳ ኪታዛ ቃንሳራ ኢንቴሰ ፃፋዲሰ። ታ ሄሳ ፃፊዳይ ኢንቴና ዞራናሴኔ ሃይሴ ቱሙ ያሳ ኪያቴሰ ጊዲዳይሳ ኢንቴሰ ቆንጨሳናሰ ጋዳ። ሄሳ ጊሽ ኢንቴ ሃይሳን ያሳ ኪያቴላን ሚኒ ኤቁቲ። *

13 ኢንቴ ማላ ዶሬቲዳራ ባቢሎኔን ዲዛ ሚቸ ጊዲዳ ዎሳ ኬላፃ ኢንቴሰ ሳሮካ ሸሻዉሰ። ታ ና ማርቆሲካ ኢንቴና ሳሮኬሰ።

* 14 ኣማኖ ሲቆቴላን ኢንቴ ኢሶይ ኢሳ ዬሪ ኤኪዲ ሳሮኬቲቲ። ኢንቴሰ ኪርሰቶሳይታሰ ኡባሰ ሳሮይ ጊዶ።

* 5:12 ሃዎ 15:22፥40 * 5:13 ሃዎ 12:12፥25፣ 13:13፣ 15:37-39፣ ቆላ 4:10፣ ፒል 24

ኑድላ ጩቆ ማፃፋ ንሞላ

New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source
files dated 29 Jan 2022
dffa0cbb-5f77-5875-bf95-f4176677af45